

相占雲氣占雨驗占候篇通占大象曆星經


書錄

天土

文牛

占驗

經



相雨書

黃子發撰

叢書集 成 初 編

(本印補)

相雨及書其他五種

一九三九年三月初版
一九五九年十月補印

商務印書館出版

上海虹口印刷廠印刷

相雨書

本館據漸西村舍
叢刊本排印初編
各叢書僅有此本

相雨書

唐 黃子發 撰

候氣

凡有珥者、狂風迅起。在日爲風。在月有雨。五緯生珥。大雨滂沛者二十日。

候申後日有珥者。雨在次後一日。

候日暈。午刻前暈者。風起正北方。午刻後暈者。有大風發屋拔木。風從暈門處來。視日出氣正白。日入氣正赤者。皆走石飛沙。

日入有光燭天者。晝夜連陰二十日。

日入返炤有黃光者。次後一日大風。

晚有斷虹者。半夜有雨達日中。

日已射廬。猶有霧者。細雨兩日。

三日有霧濛濛者。狂飈大起。

白虹降。惡霧遂散。

電光出西北方。雨注傾壁也。

辰刻電大風吹樹至暮遂雨。

電光與星同耀者有烈風暴雨。

日始出南方有霧者辰刻雨。

日出無風而熱者至日中則雲雷作風雨興也。

視黑氣于日下如覆船者立告遂雨。

氣從下上于雲漢者雨數日。

凡黃霧四塞者日晴則雨日雨則晴不雨不晴則民擾亂。

日沒有黑虹次後一日雨。

月中生長虹首南北貫月者小零三日大零五日十二日後大雨雹。

西北聞雷雨至之候也次後二日復來。

既雨且霧次復二日後大雨。

雨前霧者至夕頽壁也。

雨後霧者城陷之候。

遠觀十里外有青黑氣者大雨將至。

午刻日色赤者次後一日雨申刻日色赤次後二日雨。

日入光赤七日後雨日始出色赤卽日雨

觀雲

候日始出日正中有雲覆日而四方亦有雲黑者大雨青者小雨日入方雨時觀雲有五色黑赤並見者雨卽止黃白者風多雨少青黑雜者雨隨之必滂沛流潦常以戊申日候日欲入時日上有別雲不論大小視四方黑者大雨青者小雨

以丙丁辰之日四方無雲唯漢中有雲者六中日風雨如常

以六甲日平旦清明東向望日始出時如日上有直雲大小貫日中青者以甲乙日雨赤者以丙丁日雨白者以庚辛日雨黑者以壬癸日雨黃者以戊己日雨

六甲日四方雲皆合者卽雨

四方有躍魚雲遊疾者卽日雨遊遲者雨少難至

四方有雲如羊豬者雨立至

四方北斗中有雲後五日大雨

四方北斗中無雲唯河中有雲三枚相連狀如浴豬後三日大雨

日入時有黑雲相接于日雨注卽傾滴也

日沒時雲暗紅者或風或雨

午刻有雲蔽日者、夜中大雨。

日始出東南有黑雲已刻雨。

日入西北有黑雲覆日夜半雨。

清晨雲如海濤者、卽時風雨興也。

雲逆風行者、卽雨也。

日已出卯刻有大雲渾者、天陰清者、天雨。

雲在山下布滿者、連宵細雨數日。

雲若魚鱗次日風最大。

夜雨達旦盈盈不盡者、細雨還大也。

天中有雲亂擾者、風雨最多也。

日出紅雲見申刻有雨。

雨隨風亂飛無力者、霎時大霧天黯也。

日沒紅雲見次日雨。

凡秋冬以東風南風有雨、春夏以西風北風有雨。
訊頭風不長過後風雨愈毒也。

夏日雨過東風起遲暮越
大將拔屋

凡候雨以晦朔弦望、雲漢四塞者、皆當雨。

如斗牛彘者、當雨。

暴有異雲如水牛者、不三日大雨。

黑雲如羊羣奔如飛鳥、五日必雨。

雲如覆船者、皆雨。

北斗獨有雲、不五日大雨。

四望見青白雲、名曰天寒之雲、雨徵。

蒼雲黑色細如杼柚蔽日月者、五日必雨。

雲如兩人提鼓持桴者、皆爲大暴雨也。

日入時雲皆如亂草者、次日雨。

朝辨雨法、有黑雲如一匹皂于日中、卽一日大雨。二匹、二日大雨。三四、十日大雨也。

青白赤黑雲在東西南北、名曰四塞之雲、見卽有雨也。

日午刻有風亂動幃帳者、立時雨至也。

日出其下有雲如散泉者、卽雨或次日。

日中南方有雲如散泉者、申刻雨。

日入日上有雲如散泉者、或在日下、皆夜中雨也。

月下有黑雲如龜者、次日有雨。

察日月並星宿

日出不見雲、有大風、日出即煊、有細雨。

日出便有輝、雨在日內。

日出而雨、日入而息。

日色黑者、大霧細雨二十日。

日色無光、大雨。

日中重影、大雨三日。

日熱殺人、六月霜雨。

日出裂木、有雨。

日出射竹木、有光采、有雨。

月朔有雨、晦亦有雨、上弦日前後無雨、下弦則雨、下弦無月魄則注、晦日無上弦則雨。

月光大明、七日有雨。

三日月覆者次日雨。

晦日見月名曰炎虯日出必有雨。

月宿房雨如霰。日中遂散。月宿箕大風飛水。月宿斗口中三日大雨。月宿虛風發大水。月宿畢風雨興也。

月無光四日大雨。

月返炤大雨。

月與水宿會大雨三日。

太白入斗五日陰雨不見星。

會風詳聲

雨中大風飛雹者九日後復來。

雨後簷前有滴聲者不久又大雨。

春日北風晴日中又雨。

九日不改風每日風雨日星皆見謂之太和雨扣石無聲日中大雨。

始雨瓦木皆有聲大雨在半日後。

雨注聲如裂帛南方百里外有火災。

細雨有聲。東方五十里外有火災。

雨過瓦裂作聲。西方十里外有火災。

風雨俱從坎處入幕吹瓶有聲。北方三里外有火災。三十里外復有火災。五百里外大火流血。

推告

春雪後二旬有大風。

凡以降霜後有風雷者。次歲春多陰。

立春不見日雨在春末夏初最多也。

春日寒者。有久雨。

冬雪不積小雨將至也。

冬雪久積又有大雪也。

月二十五六日不雨初五六日必雨。

二十二日雨二十八日又雨。

正月不見雨二月不見晴。

夏旱三十日次歲春雨二十日。

秋旱三十日次歲夏雨七日不止。

凡夏旱甲子日雨者、秋旱四十日、秋甲子雨者、冬旱六十日、冬甲子雨者、春旱四十日、春甲子雨者、夏旱六十日。

相草木蟲魚玉石

每夕取通草一莖、以火然之、盡者、次日晴、不盡者、雨。

雨注著樹、不下地、邑有災也、或曰、大水沒郭。

雨凝如漆、著竹木上、其主有凶。

視鶴鳴亂翔、夸翠飛鳴者、雨立至。

鴉飛、鼓翅有聲、將雨累日。

樹穴生水、天有雨、雨落井中、生泡者、越下愈大也。

雨中鴉鳴、翅無聲、雨遂止。

視蠼登壁者、將雨之候也。

視魚躍波者、天將陰雨。

壁上自然生水者、天將大雨。

石上津潤出液、將雨數日。

雨注不息、政不和也。

虎龍相鬪。日光大烈而雨也。

犬猫食草。次日雨又晴。

候雨止天晴

雨後見漠中有雲在箕尾間。天晴之候也。

陰雨時雲下見有日光。則天晴。

雲飛疾。雨下速者。風雨卽止。

曉雲在東。無雨天晴也。

夏日夜中雨至。旦日出便止。

雨注無風。五日後始晴。

候晴六十日者。以甲子雨者二日止。乙丑雨者二日止。丙寅雨者卽日止。丁卯雨者日沒止。戊辰雨者夜半止。己巳雨者立刻止。庚午雨者一日止。辛未雨者七日止。壬申雨者卽止。癸酉雨二日止。甲戌雨卽時止。乙亥雨卽日止。丙子雨夕止。丁丑雨夕止。戊寅雨卽止。己卯雨立止。庚辰雨卽止。辛巳雨二日止。壬午雨卽止。癸未雨一日止。甲申雨卽日止。乙酉雨一日止。丙戌雨夕止。丁亥雨卽時止。戊子雨二日止。己丑雨三日止。庚寅雨卽止。辛卯雨二日止。壬辰雨八日止。癸巳雨夕止。甲午雨卽時止。乙未雨二日止。丙申雨夕止。丁酉雨一日止。戊戌雨一日止。三日天晴雨大止。己亥雨卽時止。庚子雨四日止。辛丑雨一日止。

壬寅雨卽時止癸卯雨卽止甲辰雨卽止乙巳雨一日止丙午雨卽時止丁未雨立止戊申雨二日止己酉雨二日止庚戌雨卽時止辛亥雨二日止壬子雨一日止癸丑雨卽時止甲寅雨立時止乙卯雨一日止丙辰雨一日止丁巳雨卽時止戊午雨立止己未雨卽時止庚申雨四日止辛酉卽日止壬戌雨卽時止癸亥雨立止半天雲霧見日在洞中雨止天遂晴

禱雨

冬春夏秋四時之首甲子日不宜雨雨必早在六十日後以此之時請雨則用壘土爲龍使二童舞之入山如此數日則天降甘霖也故淮南曰土龍致雨

凡少年婦女仰天大號泣不語則雨降

神農求雨書曰春夏雨日而不雨甲乙命爲青龍又爲火龍東方小童舞之丙丁不雨命爲赤龍南方壯者舞之戊己不雨命爲黃龍壯者舞之庚辛不雨命爲白龍又爲火龍西方老人舞之壬癸不雨命爲黑龍北方老人舞之如此不雨遂潛處闔南門置水其外開北門取人骨埋之如此不雨命祝巫而暴之暴之不雨神山積薪擊鼓而焚之

祈晴

雨久急欲止者取銅瓶著四五斗沸湯綿絮固口入井聲振數十里則雨止但旱五十日耳大潦欲止者使三寡婦七孤兒持搗米杵孤兒仰天號寡婦伏地哭則雨立時而止也以下闕七條

右相雨書十篇候氣者三十觀雲者五十有二察日月並宿星者三十有一會風者四詳聲者七推時者十二雜觀者十四候雨止天晴者七禱雨者三祈晴者九共爲百六十有九皆有準驗爲唐人黃子發所著夫唐三百年間論天文者寥寥可數況卜陰晴于俄頃辨風雨于一時乎歷朝以來惟漢東方曼倩著風雨書二卷京房著占一卷訖今不傳固可惜也嗣後七八百年之間絕而不彰卽淳風天綱天文之士所著亦不過占星候氣而已未嘗究竟于風雨也夫風雨之候有關於國者最大軍期祭日率有所資下至野老農夫無不秉耒而觀晴雨是以曠代不聞者或恐占之而不驗或疑五行之不詳而不知天日之理有不然者往年予適楚偶于故家敗簏中得是書殘編斷簡僅十四頁披閱其目校之祇闕數行而已于是手錄一過并贅以贊云天地之大萬物俱載不風不雨民復食土旣風旣雨乃得其所數風數雨人民其苦若夫太平之世五風十雨市井晏安之時得是書以課卜陰晴亦是隱居一樂耳大德八年歲次閼逢執徐八月仲秋紫陽山虛谷叟方回序



驗占文天

梓校靖履周